

Govor visokog predstavnika na otvaranju Međunarodne poslovne konferencije u organizaciji Kantona Sarajevo

Vrijedi izgovorena riječ

Dame i gospodo,

Organizirati međunarodnu poslovnu konferenciju usred predizborne kampanje i pred same izbore je hrabar i vizonarski potez.

Hrabar je zato što se suprotstavlja dominantnoj etnocentričnoj, nazadnoj retorici podjela; retorici revizionizma, nacionalizma i straha; retorici koja budućnost osuđuje na tragediju prošlosti.

Vizonarski je zato što poziva na povezanost, saradnju, partnerstvo i zajedništvo; obećava napredak i prosperitet; nada se i očekuje bolju budućnost za sve.

Put koji ste izabrali nema alternative. Kao nikada do sada, ovoj zemlji je potrebna politička katarza i ekonomski napredak. A poslovna zajednica, sa svojom ulogom jednoga od pogonskih motora napretka i prosperiteta, može i treba da bude dio te promjene.

Sarajevo je glavni grad Bosne i Hercegovine i njen politički,

administrativni, ekonomski, finansijski, obrazovni i kulturni centar. Sarajevo je takođe i mjesto susreta različitih civilizacija, raskrsnica na kojoj se susreću i zajedno žive tradicija i moderni život, mjesto na kome ljudi žele da žive i rade.

S obzirom da, od svih kantona u Federaciji, ima najveći broj firmi po glavi stanovnika, Kanton Sarajevo takođe se afirmirao kao dobro mjesto u kome i sa kojim se može poslovati. Njegov potencijal za razvoj i prilike koje on pruža, uključujući i geografski položaj i blizinu tržišta Evropske unije, prirodne resurse, obrazovanu i kvalificiranu radnu snagu, uključujući i onu u strateškim granama privrede, savremen pravni sistem, funkcionalnu transportnu infrastrukturu, i više – sve to čini ovo mjesto jedinstvenim i nudi garanciju povrata investiranog novca.

Ovo je već prepoznala i moja zemlja – Austrija – koja je jedan od najznačajnijih partnera Bosne i Hercegovine u pogledu obima ulaganja i trgovinske razmjene s BiH. Sa udjelom od 15%, Austrija je druga po broju investitora u Bosni i Hercegovini, odmah iza Njemačke. Austrija je i jedna od vodećih zemalja kada je riječ o ulaganjima u BiH. Ukupan iznos austrijskih ulaganja u Bosni i Hercegovini u poslijeratnom periodu iznosi više od 1,3 milijarde eura. Uz to, Austrija i Bosna i Hercegovina razvijaju dobre trgovinske odnose na obostranu korist: trgovinski balans BiH s Austrijom u 2017. godini iznosio je 100.29 %.

Ovaj jednostavni primjer pokazuje da Kanton Sarajevo – i BiH općenito – imaju ne samo potencijal da privuku investitore nego i da rade kako bi osigurali prednosti i koristi za preduzeća koja su ušla na ovo tržište.

Međutim, razvojne šanse same po sebi nisu dovoljne. Politički stabilno okruženje uvijek je bilo od suštinskog značaja za poslovanje, a tako je i danas. Institucionalna stabilnost i efikasnost, vladavina prava, borba protiv korupcije i stalno

opredjeljenje za provođenje reformi zajednički kreiraju okvir koji pogoduje razvoju zdrave ekonomije. Na kraju krajeva, zdrava ekonomija je potrebna i za nastojanja Bosne i Hercegovine da zadrži svoj najveći kapital, a gledano iz ugla poslovanja, taj kapital su, pored investicija, i talentirani građani Bosne i Hercegovine.

Iz tog razloga vrijeme održavanje ove konferencije predstavlja i jedinstvenu priliku: priliku za sve nas da izrazimo svoja očekivanja – koja s pravom imamo – da će se političari fokusirati na stvaranje stabilnijeg okruženja potrebnog za uspješno razvijanje poslovanja i ljudskih potencijala. Ova poruka je danas značajnija nego ikada, jer je ovo vrijeme u kojem veliki broj političara previše pažnje pridaje pitanjima koja dijele ljude.

Uz iskrene čestitke organizatorima koji su prepoznali ovu šansu, želim svima uspješnu konferenciju.

Hvala.